

**Regional News Unit AIR Aizawl
Saturday, September 14, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Sawrkar Flagship Programme Handholding Scheme chungchang inhrilhhriatna - Minister leh sawm bik te pualin Mizoram State Policy Coordination Committee ten an buatsaih.**
- **Mizoram a NGO te intelkhawm NGO Coordination Committee leh Manipur a Zofa unau pawl Zo United hruaitute nimin khan an inkawm.**
- **Sawrkar laipui chuan Andaman and Nicobar Island khawpui Port Blair chu Sri Vijaya Puram tiin a hming a thlak.**
- **Aam Aapni Party hruaitu leh Delhi Chief Minister Arvind Khejriwal chu nimin khan Tihar Jail atanga chhuah a ni.**

<><><>

CM

Tun thla chhunga hawn hman tura ruahman Mizoram sawrkar Flagship Programme Handholding Scheme chungchang inhrilhhriatna - Minister leh sawm bik te pualin Mizoram State Policy Coordination Committee ten an buatsaih.

Planning & Programme Implementation Conference Hall-ah Chief Minister Pu Lalduhoman he hun hi a kaihruai a, Chief Minister chuan, Bana Kaih Scheme a taka kalpui a ni thei hnai ta a ti a. Kumin bik hi chu Pilot phase angin an kal phawt ang a, nakum atang chuan huamzau taka kalpui tum a ni ang, a ti a.

MSPCC Member Secy Pu Lalmalsawma Pachuau chuan scheme kalpui dan tur sawifiahin, he scheme Apex Body chu Mizoram State Policy Coordination Committee a ni a. Nodal department thlan chhuah te hmanga kalpui tur component panga nei a ni ang. Hmalakna chhawrtute hi beneficiary ti lovin progress partner tih tur an ni a, dil tur a ni. Thawhpui tur hi line department ten an thlang ang a, training leh thil tul dang apiang an tihpui ang a, hma an lakna tinah an kaihruai ang.

A kalpui dan tur kimchang te, a dil dan te, a bawhzui zel dan tur te chu hawn a nih hnuah chiang zawka tarlan a ni ang.

He hunah hian thlai thar lei dan tur ruahmanna inhrilhhriatna hun pawh an nei nghal a. Sawrkar chuan ruahmanna a lo siam tawh angin thlai thlan chhuah palite chu a tul ang zela support price pek ngei a ni dawn tih tarlan a ni.

<><><>

NIPUN AWARENESS

Kolasib District Samagra Shiksha buatsaihin NIPUN Bharat Awareness Programme nimin khan hman a ni a, he hun hi Deputy Speaker Pu Lalfamkima, Kolasib bialtu MLA chuan a hmanpui.

NIPUN Bharat Awareness Programme hi DPC Pu Vanlalchhana (DEO) chuan a kaihruaia, Kolasib District chhunga Primary School leh Middle School 128 te hnenah Zirlai ten an zirna kawnga an hman tangkai tur leh School in an activity report an pekna tur hmanrua atan Tablet sem chhuah anih bakah NIPUN Bharat hnuuia Mizoram pum huap Music Vedio siam intihsiakna ah Kolasib District chuan pathumna lawmman a dawn hlanna hun hman a ni baw. Heng lawmman leh thilpek te hi Kolasib bialtu MLA, Deputy Speaker Pu Lalfamkima chuan a hlan a ni.

Pu Lalfamkima chuan thusawiin Zirlaite leh zirtirtu te tana Tablet sem chhuah a ni chu lawmawm a tih thu leh sorkar laipui hmalakna tha tak chu a tihlawhtlingtu ni zel turin zirtirtu te chu a fuih a, zirtirna kalpui dan a danglam tawha, khawvel changkang chho zel mila zirna kan kalpui thiam a pawimawh a ni a ti a, tun dinhmunah chuan Internet hmangin zirna kawngah kan duh ang information kan hmuh theih tawh avangin hman tangkai thiam a pawimawh ani a ti baw.

Deputy Speaker chuan, sorkar atanga an thil dawn te an hman tangkai a ngai a, dik tak leh fel tak, anih dan tur ang taka n kalpui thiam a pawimawh thu sawiin zirtirtu te chu naupang enkawl kawngah mawhphurhna sang tak an neih thu leh sorkar in a rawih chhan ang taka naupanhte ah thiamna tak tak tuhtu ni turin Zirtirtu te chu a fuih a ni.

He hun hmanah zirtirtu kal khawmte hnenah Resource Person thlan bik ten NIPUN Bharat awareness an nei nghal baw a ni.

<><><>

KHAWZAWL KVK

Champhai District Krishi Vigyan Kendra, Khawzawl chuan an Training Hall-ah District chhunga Tomato chingtute leh Tomato Growers a hruaitute nen Farmers Scientist Interaction leh Tomato chi semna hun an hmang a.

He hun hi Dr. Malsawmkimi, Senior Scientist & Head, KVK chuan a kaihruai a, Pu K. Vanlalthiana, Deputy Commisioner Khawzawl District chuan khuallian niin a hmanpui a ni.

Pu K. Vanlalthiana chuan thu sawiin KVK thawhrah chiang taka a hmuh theih chu lawmawm a tih thu a sawi a, kuthnathawkte tan thiamna sang zel kara ke pentu ropui tak an ni tih a sawi baw a. Kuthnathawkte mipui tana entawn tlak an ni tiin a fak a, theihtawp chhuaha hlawk zawk tura hna thawk zel turin lo kal khawm te a fui baw a ni.

Tomato chingtute hi khaw hrang hrang Tuipui, Tualte, Chawngtlai, Neihdawn, Rabung leh Khawhai atangin an kalkhawm a, he hunah hian Doubling Farmers Income (DFI) hnuai KVK te adopted village, Tuipui leh Tualte khua a Tomato ching hlawhtling mi 2 (pahnih), Pu Vanlalmuana, Tuipui khua leh Pu CS. Lalhmangaihsanga, Tualte te hnenah Tomato ching hlawhtling Award pek an ni.

Pu Vanlalmuana, Tuipui khua hian KVK Khawzawl ten Tomato a On Farm Trial an tih hmasak ber kum 2015 khan ching tanin, kum 2016 khan Quintal 260 tharin, cheng nuai 12 a lei chhuak a. Pu CS. Lalhmangaihsanga, Tualte hian kum 2023 khan Quintal 290 thar in cheng nuai 11 a lo lei chhuak tawh baw a ni.

Tomato chi an sem hi Kg 8 niin cheng nuai 3 leh sang 4 man hu a ni a, heng khaw hrang hrang te hi tuam zo tura ngaih ani. Tomato chi sem chhuah te hi Arka samrat leh Arka Abhed variety te an ni a, henge hi Indian Institute of Horticultural Research (IIHR-ICAR : NEH), Bengaluru te nena tangkawpin an pe chhuak a ni.

<><><>

NGOCC & ZO UNITED

Mizoram a NGO te intelkhawm NGO Coordination Committee leh Manipur a Zofa unau pawl Zo United hruaitute nimin khan Central YMA Committee Room ah an inkawm a.

Meeting hi NGOCC Chairman Pu Lalhmachhuana Central YMA President chuan a kaihruai a, Inkawmhonaah hian Zo United kal zel dan tur leh Manipur a Zofa unau hrang hrang te inpumkhatna leh inunauna chungchang te sawiho a ni a. Zo United hi Zofa unau hnam hrang hrang te lungrual taka an telna a nih avangin tih chak zel a tul thu te, inunauna leh inpumkhatna kawnga theihtawp chhuah a tul thu te sawiho a ni.

Zo United hi nikum September 7 ah khan NGO Coordination Committee in Manipura Zo hnahthlak unau pawl hrang hrangte nen Central YMA Committee Room ah din a ni a, Zo United hi Convener Pu Albert Renthlei hovin an tel a, Zo United a tel pawl hrang hrang - Hmar Inpui, Mate Tribe Council, Zomi Council, Mizo People Convention, Sukte Tribe Council, Paite Tribe Council, Tangkhal Tribe Organisation, Hill Tribe Council, Manipur Tribal Forum Delhi, Indigenous Tribes Advocacy Committee aiawh theuh te an tel a. Pawl thenkhat kawng chhia leh harsatna dang avanga tel theilo an awm baw.

<><><>

SERCHHIP ASF

Serchhip District ah Vawk pul hri a la reh lo a, hrilen mekna veng leh khua 4 ah Vawk 11 thi lehin, hrilenna Veng leh Khua 6 ah Vawk 11 suat leh an ni

Nimin khan ASF avangin Serchhip District a Vawk hrilen mekna Veng leh Khua 4 ah Vawk 11 thi leh in, hrilenna veng leh khua 6 ah Vawk 11 vek suat leh anni. Nimin bikah hian hri len mekna Chhiahtlang ah Vawk thi tam ber in Vawk 5 a thi leh a, Vawk suat tamna ber New Serchhip Serchhip South ah Vawk 4 zet suat leh anni bawk.

Hetihian, nimin thleng khan Serchhip District pumpuiah African Swine Fever (ASF) vang hian Vawk 3213 zet thi tawhin Vawk 6450 zet suat (culled)anni tawh a, ASF avang hian Thenzawlah Vawk thi tam ber tawhin Vawk 1049 zet a thi tawh a,Chhingchhipah Vawk suat (Culled) tam berin Vawk 1304 zet suat ani tawh bawk ani.

Hetihlai hian,Serchhip District a Vawk hri lenna veng leh khuaah te hian Vawk 4573 la awm anga chhinchiah niin, District chung Veng leh khua engemawzat chu ASF hri len mek na 'Infected Area'ah puan mek ala ni bawk a ni.

<><><>

AH&VETY MINISTER

Sorkar laipui Ministry of Animal Husbandry & Dairying buatsaih, India ram AH&Vety Minister te intawhkhawmna 'Monsoon Meet' chu Bhubaneswar, Odisha ah nimin khan neih a ni a, Mizoram AH&Vety Minister Pu C. Lalsawivunga pawh he hunah hian a tel.

He intawhkhawmnaah hian Union Minister Raju Ranjan Singh chu khuallian a ni a, state tin atangin Minister leh official enggemaw zat an kal a ni. He Monsoon Meet hi ranvulha eizawmna leh bawngnute thar chhuahna kawnga sawrkar hmalakna hrang hrangte sawt zawkna tihhlawhtlin a nih theihnana Sawrkar laipui, State leh UT te inrawnkhawmna leh sawikhawmna a ni.

He hunah hian Minister Pu Lalsawivunga pawhin thu sawiin Mobile Veterinary Unit hnuai mi chhawrte hlawh central atanga release thuai a tul thu te, ASF in Mizoram a tuam avanga kn tawrh nasatzia te, ran vulhtute chhawmdawl an ngaih thu te sawiin Central sawrkar chu hma laksak turin leh vaccine rang taka siam emaw ram dang atanga lakluh dan kawng dap turin a ngen a. Hri leng awm thar tur ven leh hriselna kawnga Govt.of India in chak taka hma a laknaah Mizoram sawrkar pawhin theihtawp a chhuah mek thu leh a chhuah zel tur thu a sawi a ni.

<><><>

PORT BLAIR

Sawrkar laipui chuan Andaman and Nicobar Island khawpui Port Blair chu Sri Vijaya Puram tiin a hming a thlak. Union Home Minister Amit Shah chuan hemi chungchang hi social media lamah tarlangin ramdang awpbehna ata zalenna tarlang thei tura thutlukna hi siam a ni a ti a. Sri Vijaya Puram tih hian ramin zalenna a sualna kawnga a hlawhtlinna a entir a ni a ti.

Union Home Minister chuan Andaman and Nicobar Island chu ram zalenna sualna kawngah leh chanchin hluiah hmun pawimawh tak a ni a ti bawk.

<><><>

KHEJRIWAL BAILED

Aam Aapni Party hruaitu leh Delhi Chief Minister Arvind Khejriwal chu nimin khan Tihar Jail atanga chhuah a ni.

Puan tawh angina Supreme Court chuan CBI ten excise policy-a eirua puh avanga an man Delhi Chief Minister leh Aam Aadmi Party (AAP) national convener Arvind Khejriwal chu nimin khan bail-in a chhuah. Pu Khejriwal-a hi cheng nuai 10 bail bond nen chhuah tir a ni. Judge pahnih awmna Justice Surya Kant leh Justice Ujjal Bhuyan te awmna bench chuan Delhi Chief Minister-in CBI ten an man dan a khinna leh bail a dilna chu an ngaihtuah a. Nimin khan bail hi an phalsak ta a ni. Nilaini khan Delhi Court chuan Chief Minister Khejriwal-a judicial custody hi tun thla ni 25 thleng a lo pawhsei sak tawh a ni.

AAP hruaitu Khejriwal hi kumin March ni 21 khan excise policy-a sumchhehrelh chungchanga puhna avangin Enforcement Directorate te chuan an man a. June ni 26 khan CBI chuan he thubuaiah vek hian an man chhonzawm leh a. Supreme Court in July ni 12 a interim bail a phalsak hnuah CBI ten an hreng chhonzawm leh a ni.

<><><>